

太原王氏家乘

己未孟春
拜嶽謹署



癸

254
4003
10

王八千茂才墓誌銘

西莊始存稿卷二十九與唐八繡合銘

王鳴盛

印

墓銘之作吾無兩人共一文者有之自葉正則銘其友陳同甫

王道甫始以兩人之志行同也唐君八繡王君八千同為蘇州

印

常熟人八繡長於八千二年里中呼為二八同為諸生而交最
暱八千不見八繡則不歡八繡甑中生塵漫不問而獨時時走
覓八千相對劇談連日夕不休兩人工為詩八繡語皆獨造務
為卓詭而八千綺豔婉縟其清新拔俗則同也書畫亦並入妙
品性儻葛無羈檢仗氣振奇不樂居城市多從緇衲黃冠往還
荔牆杉屋荒墟廢村寂歷無人之境輒流連旬月久之厭去遷
轉無定處間遇博場酒肆亦或闌入浮白呼盧拍袒狂叫以為

笑樂屢試於有司卒不遇累欷大詫咯咯然伏以死無弗同者
獨入繡好遠遊依人入蜀行峻峽中百丈忽斷舟從怒濤巉石
間倒流而下幾不測居三載流浪慕歸一發於詩歸而貧益甚
則跳身遊京師度河舟覆伏船背行十數里遇救得生既抵京
從人兩入木蘭一至吉林入繡不習騎而吉林地多塔兒頭者
蓋泥淖中水草交結當鞭馬疾過遲則陷入繡幾陷復出其危
困如此而久不歸八千深恨之貽書詰責謂其違性而徇俗非
全身養壽命之道入繡未能用果客死京師而八千獨終於牖
下八千以母病奉湯藥積勞鬱得疾而死蓋入繡死於遊而入
千死於孝惟此爲異然兩人之年則皆止四十一王子曰予交

兩人不如兩人相與交之深然皆予友也從葉氏例合志之八
繡諱黼廷父自江右來遷早孤盡讓產於其庶母弟而已常忍
飢八千諱大椿烏目山人王翬其曾祖也父早世無子母江氏
守節踰年伯氏生男以爲後卽八千也八繡卒於乙亥九月八
千後二年而卒予於丁卯歲先識八千於金陵及來京師交八
繡夜風雨共被臥聞牆外丐者乞食聲甚哀予蹴八繡足曰聞
之否子猶勝於彼何感焉八繡怒曰唉子之不知我也彼甚豪
我敢望耶予請其說八繡曰彼乞而得食則飽食不得食則掉
臂去槁而死無不可者我則安能嗚呼其可悲也夫世之富厚
輝赫康強壽考者凡福靡不備而兩人之困至於此何其相懸

也或慕權勢爭名利貪而不知止以傷其生亦其宜也兩人浮
湛隱約安飽以終天年宜若無難而至於此蓋才與不才自榮
自彫天皆聽之都不省記如是焉而已矣其可悲也夫銘曰
或歲晚而猶妍或日及而遽蕩夫孰知其然也或萬錢而一膳
或甘藜而嗜炭夫各適吾願也非入廟之犧而亦不得爲曳尾
之龜有孔翠之章而亦不以虞羅而見戕斯蓋造物者之所忘
乎而吾人之所傷也虞山之里尙湖之澨慧鬼頑仙一邱潛翳
生常比影死當連袂文章何處哭秋風萬古才人同一喟

旌表節孝從叔祖母蕭太孀人傳

太孀人姓蕭邑右族也父嗣存公國子生母王氏卽夫之姑也幼知大義年及笄來歸余從堂叔祖鴻源公諱守創溫恭淑順敦詩禮寡言笑結褵一載而鴻源公遭疫疾太孀人夜禱於天願以身代卒弗應鴻源公旣歿孀人欲殉焉其姑朱太孀人亦孝婦也力持之諭以奉養大義孀人彊起承歡退則飲泣痛絕漸至委頓旣而曰上有翁姑下無子嗣禋祀不保死復何補乃婉言請於姑勸翁置造室以延似續翁遂娶妾時乾隆二十年田疇荒蕪家計窘迫雖有薄產無力能墾治孀人曰舅姑年踰六十尙未能息肩是余之罪也卽鬻其奩具簪珥倩人耕種一

切家務悉孺人支持次年翁所娶妾時氏生一子名曰泰和翁命繼鴻源後孺人仰事俯育左支右絀又善養志肥甘輕煖未嘗缺乏而自奉則食粗糲服荆布繼以紡績備嘗辛苦不敢令翁姑見也三十一年翁病卒孺人盡哀盡禮奉其姑益謹曲意慰解務使姑心歡悅乃已三十八年爲泰和畢姍姑忽得病孺人衣不解帶者累月延醫問卜靡不周至明年春姑病卒孺人哀毀骨立而猶營謀喪具俱盡其禮次年謂泰和曰汝我叔也昔翁憐我孺獨命以叔爲子今將卜葬大宗不可紊亂俟叔生子以嗣伯兄後禮也時孺人以積勞致疾急奉其舅姑安葬先塋卽於是年秋八月十七日謝世享年四十有九親鄰聞之無

不哀其賢孝敬其清節而爲之涕泣者族間數有仰其高風而
循效其賢蹤者信乎純孝大節足以厚風俗助教化也明矣後
泰和連生四子以長子晉昌承鴻源公後余於蕭太孺人之節
孝而不能無說焉夫以伶仃弱質而恭承慈命送往事居承先
啟後兼之家貧困苦飲檠茹荼晨機夜紡鞠躬盡瘁繼之以死
嗚呼若太孺人者真無忝所生矣鴻源公姊夫孝廉陸士坊曾
作王孝婦小傳惜不得讀其稿觀邑志所載與所傳口碑同道
光六年憲獎節孝送粟主入總節祠十六年春常昭兩邑公舉
節孝貞烈采報合例未旌者彙案請題 旌表以闡幽光而揚
苦志而蕭太孺人沒六十年方逢盛舉得邀總 旌如例歷年

雖遠而節孝益彰余得與采訪之役謹述其所知者而爲之立傳補入家乘與凡爲婦者矜式焉從姪孫廷楷謹撰

敕贈儒林郎國學生芭伯王君傳

道光三年夏淫潦東南諸郡田禾盡淹秋霖木棉亦盡歲大稔道殣相望當事以聞朝廷發帑金巨萬振卹有差吾邑好義者亦相率輸錢助振張家墅災獨差振不及王君芭伯慨然曰同被災而使之向隅乎請於縣自振其鄰近七圖縣令躉之造其廬君益感奮復輸續振錢如千緡於是遠近聞風者如響之應矣禮大司徒以六行教萬民曰孝友睦婣任卹州閭族黨則使之相調相揀自教化不行而風俗亦寢衰矣今者蠲振之詔下王君能踴躍赴義若此固由於天子仁聖有以潛驅而默率之而君之居心行已不於此而槩見哉君諱文瀾字

起八自號芑伯系出宋合州守詔加甯遠節度使堅第十七世
堅子常州都督安節與節度同殉國難事見宋史弟安義始徙
居常熟之六河鐺腳又自六河徙張家墅高祖楨曾祖世熙祖
旋吉父銘俱潛德弗耀君以儉嗇起家布衣蔬食一冠必數年
乃易於他物悉類此或譏其矯君曰某福命薄如是已過矣而
於喪葬祭祀之禮必誠必豐遠祖之墓以時修葺無缺年七十
諸郎將爲開筵召客君獨召諸佃農減其租額人稱長者性好
讀書以所居宅分授諸子別築一椽取淵明詩意顏之曰還讀
日手一編陶然自得也

論曰癸未歲之災吾邑陳翁象明輸助最力其次則君未幾而

陳翁歿君又繼之人咸謂爲善不獲報如勿爲也烏虜此世俗之見耳善者人心之所固有君子特葆其初而已豈預夫修短之數哉

賜進士出身翰林院庶吉士 武英殿協修官邑人孫原湘撰

先府君傳太史初作尙多數語後刻入集中多所節去益簡

潔蒼古今依集本

霖謹識

國學生叔祖大昌公家傳

姪孫炳章卷衙

公諱志泗字旭升大昌其號也爲章之曾祖學盤公次子母凌太孺人學盤公弟學顏公邑庠生諱鑄早卒無嗣公生而岐嶷學顏公配劉孺人見而喜曰吾有子矣甫免乳卽抱養教育不殊所生比長公事嗣母亦不殊所生公讀書未成遂援例入國學會嗣母劉青年矢節撫公成立歿後公遂爲具其事請於朝得旌如例嗣母有養女素珍愛之以許某族公豐其奩贈以冀得嗣母歡當某族豪貴時父子俱任監司公不數往惟歲一省義姊而已迨義姊聳獲譴籍沒臺使者詰其奴與王氏可有來往奴以實對公得免株連藉令公稍有趨附之見而往

來既密其不至及其禍者鮮矣義姊家既破歸依公公待之一
如未嫁時曰吾安敢一日而不體嗣母心也公於章祖義行公
爲弟而公性贛直不少屈於人然聞義行公言無弗聽從每臨
事更相權商臨財亦更相推讓白首友愛怡怡無閒世有骨肉
秦越者觀之亦可少愧也哉公喜蓄古玩於名人書畫尤能辨
其真贗道光六年邑令李公名廷錫創建義倉公捐穀八百石
例得議叙會李公去不果茲當續修家乘因思公之行不可以
無傳爰撮記其梗概如此生卒子配詳世系表茲不復贅

公精於書畫其長於大昌其...

公之...

旌表孝子贈奉直大夫秋園王公傳略

同里 陶貴鑑

王秋園先生爲耕烟山人五世孫母葉太孺人早卒父盛斯公
方辛苦治生藉什一之利贍其家先生因輟章句業助之上事
老親下撫兩弟孝友兼至淑配衛安人主持中饋佐南陔之養
三十餘年毫不懈怠逮盛斯翁謝世先生盡禮盡哀宗黨爭稱
誦之時季弟旭升前卒遺孤纔四齡先生飲食教誨竭盡心力
不幸弱冠殤逝先生悲痛逾常弟婦繆氏青年守節歿後爲請
旌典 命下如例仲弟永昇病歿有三子先生視如已出一
切婚嫁喪葬之費皆爲經營未嘗吝置生平晦迹市廛先世多
通儒宿學輒誦古人遺子滿籛金何如教一經語夫若婦以教

子爲事衛安人通曉書義能辨四聲九熊課讀恒丙夜不休令
子虞英早補諸生有聲庠序衛安人歿後先生伉儷情深單棲
終老虞英遇事幹練當途推重凡邑中水利城工賑濟及賓興
局海防善後事並奉先生命盡心規畫足以經久先生嘗曰不
能出而用世藉此有益於桑梓亦稍紓利濟之志因是連得優
叙去年先生開九表觴登堂祝嘏者輿馬塞途綵衣照耀一時
以爲盛事先生常以耕烟山人所刻清暉贈言年久板片刊敝
因爲補刊成帙書中如吳梅村王漁洋汪東山徐棻若諸名流
清辭麗句固足爲畫苑增色而煙客廉州好賢禮士之雅千載
後得於卷軸遇之眞藝林瓊寶也先生心地慈祥人有以緩急

告者必勉副其意或有誑之者亦不忍逆億坐是常患支絀然
胸襟高曠曾不芥蒂余嘗讀大雲山房集知耕煙山人篤於故
舊憚南田歿後山人爲經紀其喪買地以葬如先生之好善樂
施解推不倦信足步武前徽流芳譜牒矣平時守柏廬家訓黎
明卽起躬掃庭戶少時頗好奕邑中推爲高手中歲絕不復爲
曰此又不免爭心也嘗於城北買故宅一區擬爲耕烟山人立
專祠並爲合族祔祭工築未竣諄諄囑其子必成之綜觀先生
行誼天稟長厚舉念肫誠宜其身享大年子孫逢吉而解脫之
際曾無患苦惟勗子孫以謙恭勤儉常守家風嗚呼若先生者
豈非有道之士克全其付畀而不以世故汨之者哉虞英嘗問

字於余每述先生之素履心向往之間先生之逝泚筆爲書其大概欲天下後世知耕烟有賢子孫足爲立品尙義者勸先生諱潮凱字耀昇秋園其自號也子一元鍾虞英其字由邑庠生授州同知孫二人紹沂紹俊皆循謹向學道光二十五年八月
中浣

從叔父鳳池公傳

姪 廷楷 菽園

公諱屏翰鳳池其字也世居白茆之濱爲宋節度忠壯公第十
八世裔孫宜城令吟濤公之從孫父諱伯和母朱氏公七歲失
怙賴寡母撫育與呱呱弟妹共居已知愛敬就塾讀書卽不事
遊嬉蓋其老成舉止自冲幼已然吟濤公解組歸田廬舍相去
數武公朝夕往謁修諸孫禮吟濤公器重之會家貧讀書未竟
所志而吟濤公謝世後亦無人提撕矣公雖輟學力田而於文
章根柢德行本末每欲探其源委時與里郛中有學問者賞奇
析疑談論忠孝娓娓不倦此非公之能踐實行不蹈虛聲歟洎
乎成立婚娶備歷艱難越十年而子女成行矣公教子努力讀

書待先生忠且敬北堂定省南畝躬耕勤劬周至雖家務旁午
外事紛紜而治之井井有條理故得小康嘗誠諸子曰立行顯
名人子分內事耳苟或未能亦當恪守繩墨使內行無虧家聲
勿墜庶不失爲端人焉母朱太孺人歿附身附槨克盡誠敬去
年冬爲長子娶婦方慶抱孫有日而遽獲疾不瘳易費時顧謂
家人曰我辛勤一世未嘗一日偷安今與汝曹永訣矣所不與
目者吾母一生苦節未彰次子學業未成耳汝曹其勉之言畢
而逝年四十有五娶朱氏母族也子五人長汝霖次汝材早夭
次振鵬邑庠生次汝棟幼子汝榮殤女一禾字

論曰余觀叔氏生平言行志節有足稱焉而竟以布衣終其命

矣夫雖然公有賢嗣克紹箕裘他日必能光大門閭以遂公生平未逮之志而公亦可含笑於九原也余忝居猶子之列時蒙下問於子姓行中獨加獎許故於公之歿也不能無辭焉從弟汝霖等衰經來請余立傳余愧不文聊述公生平行事采輯成篇備入家乘庶幾公之潛德弗泯俾後世子孫亦知乃祖裕後之意云道光四年歲次甲申季冬月

國學生鶴亭王君墓誌銘

婁東 季錫疇 菘耘

吳中自有宋范文正公以義田贍族後世仿而行之比常熟大
姓尤多東鄉張璽王氏亦其一也王出宋合州守加凝遠節度
使諡忠壯諱堅後十七世至國學生文瀾字芑伯好義樂施道
光三年邑大潦嘗領喪輸金助 國家賑恤災民頌之晚歲以
田授諸子將以其餘設義莊不果而沒子鶴亭率諸弟增益其
田定規制綜條簿請諸大府聞於 朝有 詔旌表而存檔於
官爲子孫守時道光九年也國學君未竟之志至是始酬君誠
不愧主器哉君旣歿將卜吉以窆子廷燮介子族孫文璿來請
銘余謂卽其一事於法宜銘矧君之行有足述者迺按狀以誌

之君諱用楫字濟川鶴亭其號也高祖世熙國學生授州同知
職 旌表孝子曾祖旋吉國學生祖銘父卽國學君 欽旌義
行母氏席昆弟五人君居長幼敏慧善讀習舉子業斐然成章
早理家政未竟業補國子監生性孝友喪父母盡哀盡禮叔弟
早卒撫從子如子生平葺祖祠廓墓田築丙舍率先行之不靳
貲旣置公田於祠復以始遷祖下營冢多續置如干畝別爲遠
祖墓祭田附義莊理董亦呈請存檔以垂久遠日用儉約喜施
予道光癸巳春麥不登飢民載道君計口給錢全活甚衆他若
濬白茆修鬢宮資賓興皆黽勉捐助戚友以緩急告無弗應雅
愛藏書值善本購之插架千卷精整可喜教子嚴延名師以訓

督責不少假閒居執卷耽玩既老不輟生於乾隆四十五年六月二十九日卒於道光二十四年十月二十九日年六十有五例封儒林郎議叙八品銜兩娶於孫例贈安人有閩德先君卒繼配劉丈夫子二人廷燮元配孫氏出候選布政使司理問廷燁繼配劉氏出議叙八品銜女四人孫男六人孫女三人婚配詳行狀不復贅咸豐元年十一月廷燮等奉君柩葬於三十一都七圖矢字圩新阡啟孫安人竊合焉銘曰

義莊餼族先人立教志事繼述家督克肖綽模名揚孝乎惟孝推惠鄉里仁風爭效種德若耕有秋食報體魄永安流光遠耀

例授修職郎例晉儒林郎國學生鶴亭王公傳

婁東

魏春藻

子馨

公姓王氏諱用楫字濟川號鶴亭世系具詳家乘故弗著公生而警敏記問絕人未弱冠應童子試嗣因親老事繁遂輟舉業佐父理家政年雖少井井有條理父心大慰公性孝友念王氏族多孤寒奉父遺命建置義田千畝並立專祠規模悉備大吏達諸朝恩獎如例坊表巍煥每朔旦必晨興肅衣冠率家人入莊祠虔謁先靈然後開倉發粟義莊成例歲以爲常觀於此而孝弟之心有油然而生者矣近世風俗日敝父子兄弟別財異居纒耨箕帚之間猶吝乞假較公之立心行事公私相去抑

何遠哉公之好施若出天性他如葺宗族之荒墓周親故之孤
貧邑中設賑局濬河渠修學校建橋梁靡不慷慨輸蠲絕無吝
色具兼人之稟長身玉立聲加洪鐘性嗜學購書千卷暇日卽
手一編務窮其旨趣之所在子若孫出就外傳待師尤竭忠敬
故其後之人登仕版列膠庠方隆隆起天之報施善人非偶然
已公歿於道光二十四年春秋六十有五國學生議叙八品銜
元配孫龍伯公女繼亦孫蔭堂公女再繼劉榮光公女子二廷
燮候選布政使司理問廷煒議叙八品銜女六劉安人于歸時
廷燮兄妹尙幼安人操內政均平純一罔有偏私蓋家道之成
安人與有功焉故附著之

論曰積善之家必有餘慶昔公之先世晉國公嘗手植三槐於
庭謂異日子孫必有爲三公者此固實乎莫及而仁者必有後
公亦宜有可必者在矣同治辛未仲夏

敕贈修職郎淮安府清河縣學訓導例授儒林郎候選州同知
國學生雨巖王公傳

公王氏諱霖字潤之雨巖其篆也系出宋合州刺史功加節度
使堅堅子統制安節殉常州難弟安義避兵常熟六河鏞郟後
數世遷今張墅 國朝雍正初縣析昭文遂爲昭文人高祖世
熙曾祖旋吉祖銘俱潛德弗耀父芑伯公諱文瀾生五子公其
仲幼岐嶷讀書數行俱下弱冠習舉子業師事同邑蓬洲馮先
生下帷攻苦戚里莫窺其面然桐子試卒弗利援例入成均旋
加州同知銜非公志也公好善樂施於本支尤重慮族人有貧
困者弗克周給借伯兄用楫季弟士栻倣宋范文正公捐置義

田贍濟規條一如其例以歸美於父芑伯公呈請大吏上諸

朝建坊 旌表創立專祠有司春秋致祭後又延族弟廷楷修輯家乘本收族爲敬宗一時義公所爲者爭慕尙之公見義勇爲邑里中諸宜行事率先倡舉性沈靜簡默與人言呐呐然如不能出諸口然發必衷理嘗謂人善則人欺今世人不過剛則過柔故每至不諧於俗必剛柔交濟然後能與物無忤聞者聽其說焉年逾四十無子昆季爲置造室公慨然曰禮不云乎兄弟之子猶子也吾何爲哉卒遣去戚某早亡遺一女公撫爲己出爲擇婿室婁江陸生文海奩贈甚厚其他行誼多類此生平尙樸素常布衣蔬食少年銳意科名遂於詩文時藝尤有可爲

人矜式者鎮洋郁春潮選入二兩文鈔凡若干篇云公卒於道光十有八年閏四月初十日春秋五十有四娶於董無出以士
棻長子炳章嗣

論曰今世爲人傳者往往撫拾浮詞毛舉生平孝友若何內外禮遇若何及歿之日則戚里婢僕無不爲之大慟者以張大而誇美之然此特其從同同者也余於公故弗著著其大且實者例授文林郎揀選知縣甲辰 恩科舉人世愚姪婁江楊春熙
頓首拜撰

王孝子傳

孝子既卒之二年大吏以孝行入告得旌表如例越三十有四年其孫宗憲延予教讀手其先行略乞爲傳按略孝子姓王氏諱士栻字席珍一字芝林蘇州府昭文縣人曾祖旋吉祖銘父文瀾昆弟五人孝子行居四少應童子試出其曹院試輒不遇以例入成均叙河功晉八品銜道光十有五年卒年四十有九孝子之父芑伯翁者以積善力行重於鄉當道光癸未水災之歲獨捐賑鄰近七圍初議以錢歸總局令貧戶入城支領孝子謂飢民朝不謀夕往返艱難實惠或不徧力請當事得自給發民大便王氏自宋凝遠節度使忠壯公父子殉節次子安義

避居海虞之六河錯脚至今族大蕃滋芑伯翁擬仿范文正法
建義莊以收族未及就以命孝子兄弟既孝子以請於兩兄則
以爲田不足又費無所出孝子曰先人有未竟之志雖潔身當
爲之况不至是耶遽具千金兩兄感而從之事卒成至今利賴
芑伯翁之歿孝子先請以身代既歿毀幾滅性芑伯翁有弟某
素謹厚而數遭无妄孝子輒挺身護賴以全其他謹承先志有
可以裨於宗族鄉黨者甚衆不能盡著著其可以風世厲俗者
論曰古者有世官世祿故有宗子宗子法行如樹之有本枝葉
皆得其庇蔭後代廢不復至於宗族乖離孝友誼缺此范文正
公義田之設所以濟其窮也世變道微彼擁厚資享素封者妻

子宮室之不暇又違郵其他吾將與之遊虞山之巔而使聞長者之風也

婁東何汝鎬拜撰

敕授修職郎雲南普洱府經歷植三族兄家傳

弟廷楷 菽園

於戲吾兄之孝友慈惠人人得而知之吾兄之宦蹟官聲無人得而知焉兄卒其仲子驤出宦遊略節一編泣請爲傳因爲詮次附載家乘以俟邑志采風按兄諱槐字植三邑之張家墅人宋節度忠壯公第十八世裔孫也高祖諱世熙 旌表孝子候補州同知曾祖諱猷吉邑諸生祖諱秉鈞 敕封登仕佐郎父諱鳴珂官山西翼城縣典史母衛孺人生三子而兄居長幼秉殊資讀書有卓識嘗隨侍山右年甫冠氣槩不凡是時適川運開捐兄遵例授府知事分發雲南卽借補平彝縣典史初蒞任明敏有決斷會貴州苗匪逆命兄奉委協剿催運軍儲不辭勞

苦寇平詳功註冊歷委署白水巡檢曲靖府司獄南寧羅次兩縣典史到處廉得民情口碑載道時初公彭齡巡撫雲南公路營訪吏治道經平彝詢土人曰此方爲官孰清廉土人以典史王某對初公心識之因密委察東川一路府州縣京銅有無虧空兄奉命細心核查有虧空者以金行賂兄悉却之曰我受撫軍特達之知敢徇私耶稽查年餘未嘗少懈銷差時據實詳報撫軍大加獎賞爲之延譽於公卿間曰不意佐貳官中有如此出色人員非特廉明誠篤抑且才品兼優卽著派管瀘州銅店員初公將去任謂藩司百公齡曰王某在平彝十一年勤勞辦事毫無差謬可與一美缺稍慰其苦情遂調昭通府永善縣典

史縣多崇山峻嶺而茂林深箐間時有虎爲民害兄蒞任後卽
養獵戶多人入山捕獲年餘得三四頭以獻而虎亦斂跡不復
爲民害此非兄之德化所致歟縣又多積案縣令知縣佐有才
幹悉委審斷兄據情核理一一判定案盡銷滑吏無從作獍民
咸頌其神明在任三年邊俸報滿題陞普洱府猛戛經歷猛戛
又名猛甸其地多以猛名相傳爲諸葛武侯擒孟獲之處煙瘴
最厲官斯土者每多性命之虞然係陞缺任滿卽題陞知縣兄
持檄赴任卽整飭士官訓練士卒嚴加防禦以備不虞在任年
餘夷疆帖服時 府知事出缺兄兼攝其篆不憚煩勞未幾
廣南府經歷出缺上司檄兄陞補方欲俶裝就道而紫珊公訃

至維時兄之季弟桐官廣西路城司巡檢紫珊公卒於廣西官
解兄聞訃哀號不已卽飛札令兩弟扶匱先還鄉而已急卸任
奔喪無如宦囊空澁不能作歸計賴諸同寅憐其貧乏伙助數
百金爲盤費得以旋里舟至黃天蕩風浪大作舟將覆舟子面
如土兄端坐艙中顏色不變誓於神曰某厯官三十年從未以
屈棒打小民從未得民間一文錢區區之心惟天可表至死生
命也某何懼哉誓畢風浪漸息而舟行如故此非兄之廉介所
感歎迨兄抵家而紫珊公已葬所遺宦囊已屬烏有兄貧無立
錘僅存矮屋三間而已閉門守制足不逾戶限服闋得諸親友
伙助復俶裝北上候選留都門七年始出兩缺一雲南府知事

杭州府知事兄艱於財未能謀幹俱被擁資者謀去而兄力盡
筋疲苦不勝述幸同鄉諸公推桑梓之誼稍助以薪水資有中
翰屈敏山者兄之表戚也延兄至寓課其女孫主賓甚投契盤
桓一載而家中衛太孺人訃至急辭館奔喪旋里撫棺大慟幾
不欲生從此功名志灰安貧守禮集生徒數輩得束脩金以自
奉如寒牕老儒苦守一瓊絕無縉紳貴介氣象平居落落寡交
人亦罕見其面至於天性慈祥愷悌不愧爲忠孝後人生卒予
配詳世系表不復贅

論曰予觀今之遊宦者往往魚肉百姓勒索民財以充宦囊苞
苴暗入尙盜廉聲及其致仕居鄉驕奢淫佚橫行里黨出入公

庭武斷鄉曲無惡不作抑知其子孫未有不以驕奢敗者若吾
兄官三十年而家徒壁立實有古廉吏風惜屈於佐貳不能展
其經濟世之人但以典史才幹目之不爲時重悲夫吾謂其植
品篤行有足重矣異日必有揚其前烈者

陳孺人小傳

廷楷

執園

孺人姓陳閨名瑤真字竹僊海鹽世家女祖粵東觀察諱文父長沙太守名春澤母錢氏故方伯受春公女孺人出身顯宦而賦性幽閒幼卽敏慧長益韶秀會父之姊適金陵范氏范巨族也且爲名進士多男而無女遂請太守女撫爲己女改姓范居金陵金陵都會之地靈秀所鍾及於巾幗故孺人爲閨秀時知書解音律善寫生而尤工詩爲巾幗中領袖年及笄許字族弟蔭楠以舊嫻而締新昏者也去年夏四月蔭楠入贅金陵范氏結褵後伉儷甚篤秋九月始攜新婦歸里孺人入門能敬且和以執婦道翁姑儉樸古方不合時宜孺人隨遇而安怡然處之

絕無驕矜之色至撤其明璫羅縠而服荆布釵裙定省之暇惟
焚香瀹茗讀書繙書而已今夏六月晦舉一男三朝而殤體素
弱疾由是劇延良醫視之以爲七情所致藥石不能療至七月
十四夜竟淹然而逝年三十有二臨歿時異香滿室至五更始
散家人都覺其異時尊人太守公亦在座爲余言如此

論曰予讀墉城仙錄所載仙女杜蘭香事常疑信參之今觀陳
孺人其亦謫世之仙人歟不然何竟驂鸞之速耶茲且勿論獨
其德容才智兼備蛾眉隊中可推第一流人天旣假之以緣胡
不永其年乎嗚呼是可哀也遺稿散佚其尊人欲集而付梓爲
吉光片羽之留而以弁言見委予愧不學僅書所知者爲立小

傳附之家乘以備采風焉道光六年歲次丙戌八月

邑庠生靜溪王君傳

君王氏諱振鵬初名汝楫靜溪其字也系出宋節度使堅堅有子辟兵常熟家焉 國朝雍正間縣析昭文遂爲昭文人曾祖庭如公乾隆乙丑明通進士諱湘弟祖傳碩公祖母朱氏父鳳池公諱屏翰母朱氏鳳池公五子君行次鳳池公少失怙母朱苦節摒擋讀弗遂志每慨念先世時有顯達祖若父隱德弗彰徧觀諸子惟君堪讀書承先自幼課之篤年十一二贅鹿阿周氏遊婁東陸淡庵胡夢江兩先生門二年歸受經訥園鄭先生暨族伯綺里先生學甚奮閱數載父命成昏周氏合卺後周遽夭君返學自如亡何鳳池公棄世君就館北安吳先生家吳同

邑名宿固執贊既乃徧訪名師得窺文章奧秘而童子試輒失利君志不少挫益自刻苦務求有得後已慰先人於地下歲丙申浙水季思龔尙書知君補昭庠博士弟子員方入場文卷塗汚歸鬱甚洎得報詫出望外體素弱壯華其顛館吳氏時得咯血疾遊庠後益奮於學疾時作時止往歲夏疾大發醫不能治遂奄然長逝此亦命也已性沈默不疾言遽色與人和待友親誠痛其父不獲奉色養事母朱曲體其意然竟先母卒兄弟間怡怡如也兄時被酒詬和顏受無難色信形家言謂父塋地絕志在必遷力弗克疾革乞族人易地成之戒家人以兄及弟妹必同塋兆示不可離也悲夫君卒於道光乙巳十月二十五日

春秋四十有一配周氏繼倪氏無子以弟汝棟子元炯後棟早
亡君撫炯如己出兄汝霖先一年亡撫其孤兒女亦然女一適
徐氏

例授文林郎揀選知縣甲辰 恩科舉人婁江世愚弟楊春熙
拜譔

大嫂瞿孺人傳

元鍾

嗚呼淑女垂型不徒爲宗族光亦爲門戶計焉余兄得賢內助
謂從此丕振家聲隆隆日上何圖天不降康遽奪吾兄之助耶
嫂氏瞿金門先生長女也閨中時朝夕奉祖母起居未嘗廢離
父母倚之以娛親謂其能得歡心尤鍾愛焉兄嫂弟妹行無間
言動必循禮織紉之餘覽詩書每見古賢淑則必謂妹曰此足
留名後世願與妹共法之年二十三歸余兄子萼家故貧艱於
日用嫂則事姑孝相夫敬主持中饋不見不足能操十指以佐
所需待人優於禮持家儉而勤能法前人閨範故事皆合宜其
所謂留名後世者非空言也吾父母嘗語人曰姪幸娶此女無

內顧憂今夏五月余兄得五弟凶信往視之晚未歸嫂獨處一室吾母遣婢侍之嫂若不安謂婢曰汝來伴我汝主母之恩將何以報十月初嫂產一女兄來吾家吾母戒之曰汝婦體弱產後宜加意毋忽視兄曰今兩日間已如故吾母喜謂之曰此其德性不少異以駭人也豈意三日後傷寒疾作竟以卒年纔二十四時余適在郡城應書院課嫂病未視嫂終未送嗚呼嫂在吾家爲日淺嘉言懿行不可得而詳其歿也吾父母嘖嘖稱其孝吾叔母哭之哀思之不置吾是以知嫂之能事姑也吾兄惘然如失左右手吾是以知嫂之能相夫也見諸嫂暨女兄弟皆述其賢能而惋惜之吾是以知嫂之能和同列而以德著也婢

嫗語及之泣下失聲吾是以知嫂之能逮下以恩也戚里間並
傳其少時能致大母歡以曲慰親心者吾是以知嫂之淑慎其
儀由天性也嗚呼是不可以無傳焉

靜溪兄傳

元鍾

兄姓王氏諱咸鎮字佑堂一字靜溪三先叔旭昇公嗣也甫四歲叔父歿零丁孤苦與叔母並依吾父母及長承叔母歡母子相依爲命乙丑秋叔母病卒兄年僅十五捨地呼天毀瘠幾至傷生居常哭之慟曰吾髫齡失怙未盡孝道方謂吾母康強得以侍奉甘旨稍盡人子之心今一旦罹此鞠凶尙覲顏立於人世耶自是兄益羸頓卒至不永年者可哀也已憶兄十三歲時與鍾同受業於張東巖姊丈時姊丈館城東席氏兄弟出入必借無間言吾父母見兄體弱讀書恐不任辛苦因不令卒業然兄平時惟以流覽篇籍臨摹法帖自娛博籥遊戲之事一不闕

懷吾父母益愛憐之嘗語人曰吾家幸得此佳子弟吾弟有後
矣兄喜栽花卉尤嗜蘭家事稍閒嘗與二三知己流連山巔水
湄遇田夫樵客相與語雅不喜與俗士往還頗有六世祖耕煙
公遺韻兄動必以禮敬師友睦親族尤能恤貧憐寡感吾父母
撫育之恩眷戀之懷融融洩洩事吾父母如事親視諸從昆弟
不啻同懷而待鍾尤厚吾父母因旭昇公祇此遺孤欲早爲婚
娶以綿嗣續庶不虛所託孰意今夏五月忽患咯血症吾父母
憂懷如擣延醫治病奉佛求福心力交瘁冀兄病之獲痊也乃
病日劇至不起嗚呼傷哉以兄之立心行事粹然無玷宜乎福
祉懋膺克振先叔父之遺緒乃苗而不秀玉樹長埋天竟何如

不禁撫棺而一慟者已鍾無同產兄弟自總角時與兄同處相
愛最深方幸家有賢兄擬當門戶吾父母藉可節勞鍾亦得專
心誦讀胡天降割遽奪兄年痛雁影之長孤悲鴿原之無助回
念往時一室笑語式好無尤豈可復得乎兄邁疾後猶時詢鍾
書舍功課訓勉交至嗚呼而今已矣用是和淚濡墨綴次其行
事以抒哀惋云

封奉直大夫戶部主事虞英王公傳略

同里 蘇文海

公諱元鍾字虞英號寶華姓王氏其先系出太原宋武功大夫甯遠軍節度使諡忠壯諱堅者公始祖也六世祖耕煙公諱暈國初康熙間以精繪事聞於朝 詔繪南巡圖稱旨褒

賜山水清暉額士人榮之父秋園公諱潮凱有孝行年三十有七始生公幼穎異甫入塾已略曉文義弱冠後受知於學使陳公補博士弟子員攻苦爲科舉業前後應省試者凡十有二竟不售終不以得失介懷公內行純篤丁母憂哀毀幾不欲生居常崇節儉飲食不妄費戚族有貧匱者輒贖卹之以故人有緩急無不就公謀者邑侯知公有幹濟才凡邑中學校城垣荒政

水利遇有修舉必請董司其彊力者事卽酷暑嚴寒不少憚雖
年少者自謂不如旁及橋梁廟宇倚公以興事者比比也公爲
之庀材鳩工迄事成初無難色邑有貧興田若干畝公素主其
出入去冬大比會歲入不足則籌畫以補之猶親至金陵分給
應試者蓋誠於任事至老不倦云始秋園公會購城北故宅欲
爲忠壯耕煙兩公創建專祠而未果公次第經營卒能仰承先
志用告成功而以秋園公之孝行上聞得旌典如例專祠旁
拓地誅茅有園林之勝春秋佳日嘗招集同人飲酒賦詩間以
時藥栽花自遣雖公務交集而胸次蕭然如在事外也暇日留
心掌故而尤重節行著有虞陽科名錄常昭忠義孝悌姓名錄

自輟制舉後不爲無用之學類如此往年重遭兵燹凡城外屋宇燒燬無遺公居在東城外乃就其基址築室以居每誡子孫以老氏知足之義處可競之地當以不競勝之此豈無所得而能然與今秋偶患瘧疾遂以壽終享年七十有四長子紹沂遇事能襄公次子紹俊官農部績學厲行並有父風以公之行狀乞余爲之傳余素欽公碩行乃掇其概而書之庶志乘之採錄焉

蘇文海曰昔王僧虔父子門風寬恕兄弟子姓皆篤實謙和時稱諸王爲長者觀公居家庭處鄉里造次必存禮法未嘗見其遽色疾言其謹厚殆無愧古人乎易簣之夕親戚知舊呼爲老

佛而惜其云叻卽公之平生可知矣同治乙丑九月

誥封太宜人先妣黃太宜人行略

紹俊

嗚呼吾何可一日無吾母哉夫鮮民之痛孰不思之感之思之感之而不述平生之言行以表揚於萬一人子之罪戾茲甚所以茹痛濡墨嗚咽而不能自己者也吾母之歸先府君也年二十三逮事大父母先府君是歲遊庠讀書攻苦體羸質弱大父母年俱周甲婆婆二老以勤儉持門戶吾母上事大父母孝敬家中瑣事身任之俾先府君壹志進取踰二載生伯姊又踰二載生伯兄再踰二載生仲姊仲姊生而多病年十五殤於瘍越四載生不孝最後生一妹妹少不孝二歲不孝之生也大母已下世聞先大父言大母歿時吾母偕先府君勉力治喪不貽堂

上憂十餘年中室無閒人兒女環立大者牽衣小者乳抱吾母
支持中饋以大父高年獨居凡晨膳夕餐冬溫夏清時隨先府
君問視大父晚境優游克臻大耋皆吾母佐先府君孝養之力
也中年後爲兒女輩次第婚嫁而家日以起乙巳秋大父以九
秩考終是時門閭漸擴喪葬之日不期而會者數百人蓋先府
君負才譔廣交游冠蓋往來賓從日盛惟吾母淑德足以成之
吾母積年勞勩忽患乳癖甚劇醫藥無效每清晨持諷大士神
咒百遍默祈却病數年後癖塊潛消霍然遂愈人咸謂至誠所
感厥後吾母日有經課先府君晨夕亦時誦金經不孝聞兩大
入膜唄聲輒心喜初不孝年十二染時痘毒發遍體目矇矇若

頻見痘神狀驚而啼母曰兒勿怖有母在也房戶無老嫗吾母

一身護視目不交睫者七八晝夜逮不孝授室曾氏生一男舉

家稱慶吾母始有舍館之樂越三年媳曾氏卒吾母憐長孫失

恃携以同寢泊不孝繼娶楊氏吾母仍提携之不以委諸婦曰

吾不忍一日離孫也吾母天性明敏觀書了了每夜分喜閱古

詩源及唐宋人詩遂稍稍習之猶憶不孝入塾後初學吟詠必

索閱一日師以春燕命題吾母閱不孝所作曰無甚巧思援筆

改二句云簾前燕子喃喃語知是尋巢到此來吾母有才而終

不自炫卽為不孝改韻語亦偶然耳平日見里中舊家子弟循

謹向學每稱道以為不孝舅舅氏秋湖公少失怙恃吾母招來

書舍執業於府君不數年遊庠登賢書吾母乃色喜不孝侍側

時時以淬礪讀書爲訓丁未春不孝補諸生吾母以遠大期望

自癸丑粵匪窺據金陵南闈停試戊午屆大比之年命不孝應

京兆試并請於府君曰盍循例得京秩以作下帷計不孝官農

部趨公之暇輒理舊業兩試北闈俱見擯庚申春不孝聞南中

逆氛日熾逼近蘇常旋聞郡城失守知虞城三面皆賊難以固

守卽束裝出都由海道歸里時伯兄已侍兩大人遷居清水港

呂宅八月初二日邑城陷遂星夜航海而北賃居東洲清和氏

流離顛沛囊橐蕭然麥飯菜羹吾母安之不以瑣屑擾先府君

逮壬戌邑城收復次年癸亥賊始平乃旋里是年秋又命不孝

入都供職甲子應京兆試卷出蒲城張石洲先生清房額溢見
遺深負高堂屬望回南應本省試又不售十二月抵家見吾母
精神委頓飲食少進心竊憂之入春後稍健時負郭舊宅片瓦
無存先府君構料蓋廬舍數椽聊庇風雨一家團聚方冀色養
耆頤而先府君猝於八月杪染瘧臥床積勞力衰竟至不起吾
母悲傷過甚減及饗殮十二月初六日猝中風寒口噤不語急
延諸高明診視僉云高年氣血兩虧外邪內侵病深難治同議
表裏之方服之無效時昭邑侯沈義民先生傳精岐黃術與
先府君相善屢延定方亦云高年氣體虛弱屆此隆冬時候呼
吸之間寒氣入腹已近心胞以致口噤急投參茸或可延年連

服數劑未有轉機逮二十三日胸中似有漲漫或謂多服補劑須灌萊菔子湯進三四勺已不能受次日氣息漸微延至二十六日卯時溘然長逝嗚呼痛哉吾母姓黃氏字嘏仙外曾祖諱豫外曾祖母氏歸外祖諱金蘭贈文林郎揀選知縣外祖母氏袁贈孺人生三女吾母居長與先府君同歲生同歲卒

恩旌節孝例贈孺人王節母席太孺人傳

太孺人席氏昭文上舍濤次女也幼端慧明大義年十九歸同
邑芑伯王公叔子國學生成樑執婦道惟謹舅姑鍾愛焉旣而
成樑遘厲疾醫藥罔效太孺人焚香籲天刲臂肉以療卒不起
將身殉舅姑勸諭之曰爾亦死奈兩子一女何乃強食撫孤教
養無少弛悲其夫之不克終養也以婦道兼子道益加謹後七
年舅歿太孺人事姑彌至又二十餘年姑歿率子女從伯叔後
哀毀盡禮如舅歿時好讀書爲二子延師課誦必名下士塾中
聞客至其爲文學中人輒豐潔酒肴款之無難色若燕遊客急
命婢僕麾之去無令吾子荒於嬉也故其二子名雖未成而皆

有儒行舅芭伯公田產故饒族指繁有不贍者太孺人慕宋范文正公風勸其兄公及季捐置義田以濟族中貧乏東張墅王氏之義莊蓋自太孺人發之生平急病讓夷無論姻族來前見有衣裳襤縷卽解衣衣之道光癸未歲大祲太孺人織布累箱成衣分給寒者而以其名歸之於舅尤人所難能性寬和無疾言遽色馭婢僕多恩禮故今逮事者言及之猶淚下云太孺人以咸豐七年七月十五日卒壽七十歲子二長炳勳國學生娶陳氏上舍朝樞女次炳晟國學生娶徐氏增廣生椿女女一適歲貢生錢廷柯長子國學生煥文太孺人守節四十年長子炳勳聞諸大吏得膺旌典如例

論曰壹與之齊終身不改婦人之義也方太孺人之失所天也
前襟後裾見者難之卒能摒擋內外以義爲先家道隆然日起
豈非女中錚錚者哉余素聞太孺人之風景而慕之故因其子
炳勳誣諉爲之書其崖略云

同治十年秋九月

例授文林郎揀選知縣甲辰 恩科舉人婁江楊春熙拜撰

例授儒林郎布政使司理問誥贈奉直大夫光祿寺署正加二

級國學生理堂王君傳

妹婿 瞿 鏊

君王氏諱廷燮理堂其號也系出宋甯遠節度使諱堅後具詳家乘不復贅君父鶴亭公諱用楫性嚴事之無拂母孫太安人沒時年尙幼哭泣如成人事繼母劉太安人如己母太安人亦憐愛君忘其非已出也劉太安人生一子廷燁少於君十八歲弟畜而師教之怡怡然鶴亭公沒後食指繁廷燁奉劉太安人移家璜涇兄弟始析產旬日過從友愛倍於同居君早理家政讀書未卒業以國子生循例爲布政使司理問益自斂抑不重味不曳縞家有燕會里中子冠履鮮華君獨縕袍草躄揖讓其

間宴如也居恒晏眠蚤作瑣屑必親劬劬無倦色謂人曰吾非
好自苦欲使子孫學勤儉耳於治田尤勤戴星出入終日胼胝
不辭困瘁性任率戚友造其門不數數接見見卽具蔬開釀非
拇戰不飲非脫略禮節者不與飲飲則頽然醉醉則徜徉隴畔
呼老農輩鼓腹高歌自以爲神仙樂不是過也道光二十九年
五月大潦兩傷苗幾盡歲大稜道殣相望君領袖輸金賑濟東
六等圖七圖民賴不飢時木棉騰貴民艱紡績君平價爲倡一
鄉感焉咸豐庚申秋賊陷虞城鄉里無賴爲賊爪牙以白刃脅
君從君毅然曰吾財任若取吾志不可屈也賊囊括去遂挈眷
跳江北鄉里稍定避難者紛紛歸有勸君返者君曰吾誓不踐

賊境賊一日不滅吾一日不歸也時太安人猶羈縻涇病聞耗
倉皇歸口嘗湯藥日夕侍左右月餘太安人沒擗踊哭泣喪葬
如禮仍避江北於是悲憤成疾卒於旅時同治二年四月十六
日也春秋六十有六克復後始扶匱旋里里人傷之配陳宜人
有閩德丈夫子二厚基議叙九品銜履基光祿寺署正 欽加
五品銜女一

論曰君鄉里恂恂躬行士也屏浮崇實平居肫肫以孝友飭躬
當搶攘崎嶇之日能以不屈自矢其剛毅之概過於章服惜淹
然卽世不獲於蕩平後見向之相脅者顯罹法網爲軒髯一快
也余與君葭莩親故能得其崖略雖未能盡君媿行亦足爲當

敕授修職郎淮安府清河縣儒學訓導議叙鹽運使司知事蓉
銜王君傳

君諱炳章字闇然號蓉銜芝林公長子也家世具雨巖公傳君
稟資英特讀書過目成誦伯父雨巖公無子奇其才嗣以爲後
幼攻舉子業出語卽能驚長老芝林公命從婁東晴江季先生
遊得其指授甫弱冠受知西江筠谷辛侍郎補昭庠博士弟子
員同邑孫子瀟先生重其試藝梓行於時名稱鵲起而君刻苦
自勵窮覽經史博取先正名大家文獵其菁華下筆千言立就
一時諸名宿爭歛手避勿敢與角然君不自是也聞太倉涵香
陸先生名執贄請業先生一見器重性寬和豁達個儻風流丰

神煥發時借一二知己玩遊山水遇者咸望而異之山右聞喜
祁公視學江蘇首重經術士賞君經義特拔高等君益潛心經
學晨夕研摩每獲一解輒出人意表屢踏省闈戰弗勝壬辰房
薦俛得復失遂觀光成均例得廣文旋委署淮安府清河縣學
訓導清河南北津要貴游子弟日往來其間俗尙華靡裙屐雜
遯君不爲所染閒與其地名流泛舟湖光上下飲酒賦詩自適
其性清河人傳爲勝事君才高學博幹略復優道光甲午撫軍
林文忠公濬白茆知君能命分董工程君相視土宜一無瞻徇
功竣告最議叙鹽運使司知事銜已酉水災奉憲捐賑近圖民
沾實惠庚戌歲重濬白茆君建議白茆闢舊傍土塘闡內民田

沾利少不如移之柏家港便邑侯章公聽其說遂白請大吏移
建名曰蘇常聞至今得資灌溉者感焉君卒於咸豐三年十一
月某日年四十有八娶張氏子三宗憲例補縣丞宗惠後君弟
炳泰宗惠恩撫子培壽工詩文早夭君著作因兵燹佚制義選
入郁氏二兩文鈔人多絃而誦者

論曰君席先人餘業不尙矜飾布衣素履自比寒士見善如不
及有犯勿問其志量蓋可見矣而卒不獲一遇以終命矣夫
例授文林郎揀選知縣甲辰 恩科舉人世愚弟楊春熙拜撰

國學生稼軒王君小傳

張家墅王君稼軒者芝林上舍之子馮蓬洲孝廉之女夫也以資敏器厚將求進乎古人之樸學鄉先生長老咸以任重行遠期之而稼軒竟歿矣稼軒週歲時聞誦讀聲忻然聽五歲入塾數日識累千字每一字必問四聲八九歲經傳三禮國語國策誦習殆徧十二歲學作經義粲然有條理時蓬洲爲邑東名孝廉衡論人品才識少可多否其長女敏慧貞淑擇壻綦嚴謂稼軒可妻其必有以取之矣稼軒身弱多病十六七歲以喉癰不能誦讀因輟舉業尋入成均遂博覽乎史漢文選唐宋大家口不能誦手不停披久之疾作又復舍去旣乃學書法諳繪事尤

精音律其剖析處雖老於律者無以過然此猶末技也其敦本
也事伯叔如父母視兄弟無爾我體父母心以得大父母心大
父愛其穎悟而又謹信出入必與偕見長者坐必隅行必隨言
必遜讓入宗祠謁墟墓必敬必哀凡禋躬接物與尋常聰俊者
絕殊也大父既歿父與兩伯父勉承先志治屋建莊置義田以
贍族有司循例以聞得邀旌典大母春秋高矣以義莊屋
爲菟裘令稼軒侍食寢既成婚攜室之莊並奉興居而義田租
糈之息合族贍給之數與夫規條經費主其會計無少差繆父
與兩伯父悉委任之莊旁有一楹琴書閒靜竹木蓊蔚大父取
淵明詩意顏之曰還讀晚年讀書處也稼軒於其中溫復舊業

習制舉義質正於胞兄茂才蓉銜兄弟爲師友切切惔惔怡怡如也閱三年學業大進歲辛卯爲

皇上五旬萬壽恩科僉

勸稼軒就試南闈伯仲偕行伯父雨巖別駕方以文章經學著述名山栽培後進令其資深養到俟之正科乃蓉銜歸自金陵而稼軒遽赴玉樓矣嗚呼稼軒少成若性而敦紀飭行好學不倦若此尙冀養其根加其膏進德修業設天假之年其所成就當何如也稼軒名炳泰國子監生生卒年月詳其世系表娶馮氏孝廉名登瀛女結褵逾歲遽稱未亡以蓉銜次子宗惠爲子蓉銜從余遊故得知其梗概云

論曰東漢黃憲言論風旨不多見年十四時荀淑遇之與語移

三民家系卷十
皇
日曰子吾之師表也今稼軒甫逾弱冠天資雖敏而蘊其英華
學力未充而求諸篤實其周旋出入循循然莫不有規矩雖曰
天性亦陶淑使然歟青青子衿佻兮達兮倘遇稼軒吾知必爽
然自失矣

敕授修職郎庚午科舉人揀選知縣前任安徽池州府石埭縣
儒學教諭世愚弟鄧謙泰拜譔

馳封宜人先嫂錢宜人傳

紹俊

余嘗觀列女傳一書而歎婦人之賢淑德爲最婦德之著明大義爲先若嫂氏錢宜人其懿範徽行殆不愧淑德而明大義歟是不可無以表揚矣宜人姓錢氏曾祖諱鉞祖諱璣俱贈奉直大夫父諱椿由國子生援例授州同母陳氏封安人生四女宜人其長也年十九歸余伯兄喻梅爲室梁椀相莊篤於伉儷時大父秋園公承素業習計然書持家勤儉灑掃躬親先府君偕先太宜人咸節衣縮食寶素去華儉以自奉室僅容膝湫隘近市往來賓客之饌倚於中饋先太宜人祇置一婢供驅使力勤操作宜人素封堂奧曠如連棟比宇人方慮宜人不能安宜

人三日入厨一切非其所習而處之裕如屏紉綺御荆布襄理
內政悉以身任克順太宜人意太宜人賢之戚黨共賢之而宜
人之淑德彰焉越十稔艱於息宜人既撫甥女爲己女尤以似
續爲急請於堂上出己貲爲伯兄置造室華氏寬而能容教以
禮必令知所憚無刻責苛待意非深明大義者鮮能善遇之也
華氏生女宜人愛之如己出飲食教誨不離膝下逮余娶室魯
國氏相待和洽築里之間毫無間言洎余繼娶宏農氏待亦如
之不失冢婦率從之道自奉上以至御下規規皆合家法伯兄
負才譎迥外事每出門恒至夜分或至鼓三下宜人必謹俟伯
兄歸禮有之順於舅姑和於室人而後當於夫嫂氏殆兼而有

之矣歲庚申邑城陷侍堂上避寇東洲以紡績佐家用癸亥春
家鄉收復渡江回里屋宇蕩然僑寓海濱先生橋梅宅流離轉
徙精神耗矣於新秋染瘧症繼病痢月餘淹纏羸體難支竟至
不起年四十四嗚呼哀哉宜人歿之日余供職京都聞噩耗而
傷之傷伯兄之失賢內助也明年華氏生一子曰慶芝頭角崢
嶸岐嶷負異惜宜人之不及見也今年夏余手編府君所訂家
乘將付剞劂伯兄命補綴宜人傳特叙其崖略至生卒暨子女
配已載譜纂中不復贅同治癸酉六月

誥封宜人歸太原長姪女傳略

曾彬文

道光三十年五月初十日適太原長姪女以疾卒余哭之慟爲
撮舉其生平授其夫壻王紹俊俾異日載之家乘姪女名聰章
字範謀余兄治成公長女先嫂蕭孺人所出以道光五年七月
二十五日亥時生於直隸大名府清豐縣署時兄嫂隨侍先君
于於治所也生而婉秀余母錢太孺人最鍾愛之甫免乳卽與
同寢食閱十年而嫂以病歿先是余兄患怔忡之疾不能治家
事嫂連舉三女年皆幼病革時邀余及余婦陶孺人至榻前口
不能言手指諸女以爲託余夫婦諾之而目乃瞑余婦隨挈諸
姪女同居一室長姪女尤婉轉承順愛之逾於所生閱七年而

余婦又病卒姪女代余擯擋家務指揮僕婦秩然有條余深嘉其年雖幼而能識大體也時兄病益甚常徹夜不眠服役者託故辭去起居飲食惟姪女爲之調護嚴寒酷暑歷久不衰余益嘉其事親之孝有爲人所難者旣遣嫁太原氏逮事其祖翁秋園先生其君舅虞英州司馬君姑黃安人咸以爲賢築里之間雍睦無異言紹俊方攻舉子業篝燈佐讀敬戒不怠紹俊旋游於庠舉一子曰慶蘭人方羨其家慶而姪女處之無異常時也太原氏家本近市湫隘囂塵余方慮其不能居而姪女安之若素其家多賓客往來供具倚於中饋姪女三日入厨操刀而割數十人之饌咄嗟立辦余聞其力作之勞嘗於言歸時問之默

然不應蓋其性之機敏而沉靜大率類此今夏病初作亦不禁
劇庸醫誤投攻達之劑氣逆上升遂致不起噫逝者長已矣去
秋適太原三姪女以疾卒余深痛之或以其有不壽之徵強爲
余解若長姪女之才識曉暢體態端莊何亦復如斯耶惟是余
十餘年來相攸遺嫁方期少慰兄嫂於九原而今忽焉奄逝涉
筆至此涕下沾襟矣

倬亡兒慶蘭文

紹俊

嗚呼吾兒何竟死耶吾兒死而余之有感於先妻者更無窮矣
憶道光乙巳余年二十二先府君爲余娶室魯國氏越兩載舉
一子先府君命名曰慶蘭誌家門之慶而以蘭爲階草也歲庚
戌先妻魯國氏以微疴歿兒方四齡已解哀思吾母憐其失恃
也携以同寢處者十餘年鞠育之飲食之教誨之以漸至於長
大迄今廿稔矣猝以痘毒發死死之日余哭之慟家中無上下
皆哭失聲母之黨俱哭之今母之黨亦俱哭且哭且惜平日之
相與交好者相聚而哭蓋其天性敦篤不近藻飾負少年老成
之概故其死也莫不動色哀惋嗟乎余自戊午春赴京兆試六

七年中一再入都南北奔馳未克於吾兒施教養之道甲子秋由都南下應省試其冬旋里兒時年十八見其亭亭玉立英銳之氣溢於眉宇與之語頗近理而於世俗酬酢交接間亦具有成人之概余甚喜之其上事祖父母孝敬出於至性事伯父如父已能代伯父任外事伯父亦深愛之有事輒供驅使事繼母如所生撫弟妹友愛倍至循謹如吾兒不染冶游習氣殆慎守先業者歟乃未幾而天奪之年其命耶其數耶其余之不孝不慈而延禍於吾兒耶兒之亡也以丙寅四月五日吾父之歿也甫半載吾母之歿也祇百日兒若有待於祖父母之既歿而不貽祖父母以傷痛耶抑祖父母能有是孫而余無德以有是子

耶嗚呼余衰經方新復抱西河之痛迴念先妻在時諄諄以吾
兒相屬死而無知則已死而有知其飲恨更何如耶兒病床褥
時自知不起以兩膝向余作跪狀曰兒謝父兒負父矣言訖而
逝嗚呼書至此余不禁寸腸欲裂已同治丙寅五月

懋軒王老世伯壽序

蓋聞壽之爲言酬也天所以酬其德壽之爲言受也人所
以受其福此非可強而求倖而得也彼功深導引鍊石燒
丹者壽矣而近於僊彼厚自奉養取精用宏者壽矣而近
於參孰若我懋軒先生之壽有由得而非強以求之者乎
先生世襲簪纓門傳詩禮考其譜系自宋忠壯公始其次
子安義公避兵海隅遂隸籍焉傳至先生已二十餘世先
生之承先啟後立心行事實有卓卓可稱者先生髫齡失
怙事大父母如事父母溫清竭誠定省罔懈服勞奉養禮

無或違於爲子之道可謂無忝所生矣先生椿庭見背弟
在弱齡讓梨推棗共被聯床式好無尤迄於成立於爲兄
之道可謂誼篤友于矣先生膝下三珠英英秀發延師教
讀倍切栽培是以伯仲並蒙優敘季子尤聰穎甫成童卽
能文章遭世之亂已輟學矣平定後先生命出就外傅重
理故業由是學益進不數年而騰譽膠庠於爲父之道可
謂貽謀盡善矣先生家有祖建義莊置田千餘畝贍族成
規有條不紊每遇朔旦必肅衣冠虔謁先靈開倉發粟數
十年奉行不怠於尊祖敬宗之道可謂始終如一矣道咸

之際江蘇漕政極敝一石或浮至三四石不等而常昭尤甚先生精于錢穀洞見弊竇不甘爲衙蠹所欺遂走京師直赴部堂呈控雖以積弊日深一時未能遽革而奸胥黠吏羣震先生名歛手惕息相戒不敢犯勢亦爲之稍衰先生之力挽頽風可謂有志竟成矣粵匪之難波及海虞縣城旣爲賊窟鄉村處處擾亂風聲鶴唳草木皆兵先生勃然而起不恤毀家以紓時難於是備器械具資糧料簡丁壯設局團防鄉里賴以少安不至盡成焦土先生之能禦大患可謂勇而善謀矣先生脫畧形骸不修邊幅往往科

頭箕踞解衣槃礴旁若無人皮相之士羣目先生爲癡頑
老子先生怡然順受弗之怪也而獨不肯爲豪強所屈辱
猝遇不平事則慷慨激昂義形於色雖鼎鑊在前其氣益
壯先生之特立自遂可謂擾而能毅矣先生不愛撻菹不
喜音樂不學仙佛不羨科名胸中空洞無城府惟藉壺樽
以自消遣每遇良辰佳節月夕花朝知己相逢酒酣興發
拇戰聲高幾乎震動牆屋卽或怱怱幡幡稍愆儀度終不
爲灌夫罵座取禍當途先生之任天率性可謂大閑不踰
矣先生天分固優口才尤敏大庭廣眾中縱談當世事詞

鋒咄咄逼人而莫能敵又善戲謔或抑或揚忽莊忽諧大有東方滑稽之趣先生之語妙天下可謂層出不窮矣先生晚節厭棄塵囂憚入城市聞於邑之東南鄉構屋五楹買田數頃躬自課耕畧不厭倦故歲收恒豐以其贏餘時周卹夫鄰里之鰥孤寡獨者人有借貸不急急於索償踰時則竟置不問亦未嘗有德色先生之好行其善而純任自然也又如此而自奉殊儉約衣不重裘食不兼味以視縮衣節食徒爲子孫計而不肯拔一毫以利人者大有間也課耕之暇輒與二三鄰翁斗酒相勞酣嬉淋漓忘懷得

三上家乘卷一
失曾不知老之將至又奚乎延釐之頌祝嘏之辭以誇耀
於里黨間哉然而箕疇五福壽爲最先酌斗稱觥古人所
尙余與合似允孚茂才幼同學長同譜爲郡拜紀敢後衆
賓敬獻蕪詞用申萊祝謹序

光緒六年歲在上章執徐壯月

穀旦

世愚姪魏辰朗頓首拜撰并書

誥贈奉直大夫懋軒王公家傳

同邑吳魁撰

余與東鄉王氏昆季叔姪爲仍世交元弼居鄉元覲游宦
性皆好讀書而皆有幹才邑中嘗有大繇役奔走召募經

畫督促羣推二王其兄之子鴻飛才名噪一時研百家有
心得任視學厯蒙省道獎請於部錫嘉禾榮章歲戊午公
舉爲省議士將赴南京瀕行揖余曰我王氏修宗譜事垂
藏惟懋軒公像未有讚先生爲製讚詞旣元觀貽書云我
先祖奉直懋軒公義行卓卓爲亂世一奇男子不有傳曷
以示方來傳之者非先生莫屬余旣應鴻飛請爲懋軒公
製讚又重元觀言別乃爲懋軒公立傳公諱炳勳字懋軒
系出太原世爲常熟之張墅人生秉至性齟齬失怙毀瘠
逾成人王父母見而憐之命稍稍節哀弱弟方在抱煦嫗

覆育無不至稍長親自督教俾竝已成立家有義田千畝
隻手經營數十年如一日瞻貧卹寡靡遺靡頗族鄙感其
誠欽其公平莊政大治其磊落大節則有二端爲國家剔
大弊爲鄉里捍大患而仕不達名不顯蓋賦莫重於我蘇
蘇以常熟爲最而弊叢於遜清道咸之間戶一石或浮三
數倍加以東南連年大水民顛頓無甦理公恫於時局激
於公義走千里達京師籲大農揭蠹幕當是時自大府逮
縣令罔不慙悚惕息以待朝命胥吏或畏罪先逃公之名
遂大震無何洪楊難作由江甯撲蘇垣連陷邑城駸及於

鄉鎮邨坊巨紳龐文恪方奉命團練公部勒子弟遙應之
夜輸廩粟備糗糧集器械築壘設堠不日而守固遠近村
皆魚爛獨張璽無寇踪匪跡事定當路署軍功上其名公
功成不居隱於家終焉居平喜縱談古今事經史外無嗜
好自待嗇而愛接賓客家故豪於貲人有緩急任借貸不
責償亦無德色又善爲人解紛難義所在雖大力者不能
屈久之漸厭塵囂幽棲息影類悟道者而精悍之色流露
眉間年七十餘以壽終綜公一生篤於親敦於族拳拳於
嫻戚故舊媵修之士猶或難能至以儒生而懷救時奇策

三邑家乘卷一
三
二百年積弊思一舉而擴清不恤攫吏鋒犯眾諾奮不顧
身爲民請命又寇至則首先殺賊寇退則身隱衛一鄉隱
爲一邑障徵之往古洵不媿爲奇男子也已其世次及夫
人子姓與生年卒月具詳家乘故不縷書

吳魁曰余嘗兩遊張墅過王氏祠宇飛甍壯麗松竹交欣
宅外義田環塍錯壤牛稭稻木棉其族多子弟恂恂好學
或出外習政法肄工商穉者入鄉校王氏之盛固未艾也
抑公之流風餘韻尙有存者其軼事鄉之人每樂道之余
蓋想見其爲人云

桐軒王公傳畧

公諱廷燁字霽堂號桐軒宋甯遠節度使忠壯公諱堅二
十世孫大父諱文瀾始建義莊父諱用楫生二子長諱廷
燧次卽公也公自幼耽讀過目成誦爲文務安置妥貼不
苟下筆及弱冠應縣府試輒列前茅院試亦幾獲雋卒以
額滿見遣人咸惜之迨年二十九父鶴亭公得病親侍湯
藥衣不解帶者累月鶴亭公歿盡哀盡禮宗族戚黨交口
稱孝自後遂以家政紛煩輟舉子業其時兄弟析產一切
皆推肥取瘠蓋素性廉讓故生平不解持籌握算而與世

無爭配鄧氏馳贈奉直大夫國學生開洲公次女性極賢
淑操內政井井有條因兒女衆多遂購璜涇別墅高堂廣
厦修葺一新自張市分居於此一時名流常滿於座客有
片長可取者俱優待之祭則倍極誠敬必取時物實籩豆
延名師教諸子讀書修膳無不從豐長子治基文有進境
甫出應試而寇氛忽逼不遑安處有避難至公家者飢者
食之寒者衣之囊橐告匱者出資助之寇未靖其母劉太
宜人卒雖遭離亂喪葬不能盡禮而哀毀與喪鶴亭公時
無異寇平後長子治基遊庠公有喜色益勗諸子勤讀書

開文社便與諸少年角藝聲華遠著其書室中左圖右史
紛然羅列尤喜名人書畫四壁幾滿性復嗜古夏鼎商彝
時加拂拭而遺簪斷笏恒佩於身公本善飲每以此侑酒
後爲諸子授室并嫁二女而德配鄧孺人及冢媳李孺人
相繼歿皆盡力摒擋遂至入不敷出家貲日漸消耗因售
產償積逋遂使諸子分爨公惟杖頭日掛百錢行沽并以
蒔花種竹自娛坦然不以貧富爲忻戚也而人之頌其德
者一如昔日咸謂仁者天必永錫其後云公年逾古稀筋
力日衰諸病交作旋卒壽七十有五子五長治基邑庠生

娶李氏繼葉氏次榮基議敘九品銜娶周氏夫婦已相繼
先公歿三洪基殤四元基業儒娶歸氏五樹基業儒娶郁
氏繼翁氏女二長適馳封朝議大夫職貢生戴琪次適附
貢生董怡孫四保鑑業儒娶謝氏治基出寶鈞舒錦鳴鑾
樹基出俱幼讀寶鈞嗣榮基後孫女四治基出者二長適
東海徐氏次殤元基出者二俱未字曾孫一名魯望曾孫
女三皆幼殤公之耆年碩德筆難盡述姑記其畧以俟鴻
鉅之筆潤色焉可

光緒十有六年一陽月上浣
世愚弟陸宗源拜撰

鮑封宜人翰香王公德配徐太宜人傳

同里優廩生

秦嗣觀

士穎

太宜人姓徐氏父艾如公諱椿增廣生以宿學教授鄉閭
馳名於邑東之碧溪墅生女二太宜人其一也幼稟訓言
諳書算工鍼黹年二十三歸王公翰香王海虞望族也家
素封舅庭槐公早世姑席氏在堂太宜人事之維謹代庖
家政內外上下咸有法然不敢自專遇事必稟命而後行
姑以此愛重之翰香公得無內顧憂專意攻苦讀書明理
蓋太宜人之力居多焉翰香公性喜客豪於飲自朝至暮
尊無空時春秋佳日車轍滿戶外太宜人治肴設饌以時

三上家身卷一
應給無難色惟乘間進緩言勸之節飲公領之而未遽聽
也不數年果積成勞瘵越咸豐丙辰卒太宜人哭之慟誓
以身殉經親族勸諭乃止翰香公無子擇伯兄子後之似
續有人矣詎料寒暑未更姑又殂謝一歲之中迭遭大故
事都棘手宗族咸以爲憂而太宜人經營喪葬盡哀盡禮
罔不如制人於是悲其遇益服其才經紅巾賊起城鄉無
完土嗣子亦殲於兵裹尸還葬傷如之何所幸聘媳曹氏
深明大義矢志完貞太宜人爰迎之歸青燈寒夜姑媳相
伴廿餘年來共勵冰霜里人稱之以比程門雙節云女長

遣嫁奩贈麗都迨吉之日傾動一鄉性好潔嘗獨居一室
凡無點塵子姪輩希得進見人或以是怪之然處宗族妯
娣間卒無嫌隙蓋其內和外介又如此平生樂施與至老
彌篤有告乏者罄囊予之不少吝御下寬而有恩臧獲輩
德之有終身不願去者邇來齒益尊遇益蹇哭女哭媳老
淚盈眶賴天性曠達不爲無益之悲復得聘孫媳博陵女
左右承歡故雖年逢曰艾而精力不衰京兆子慶麟者外
孫行也太宜人因女之故愛及所生嘗來往其家或彌月
不返今秋適得嗣孫媳凶問悲悼過深遂於彼染恙力疾

昇歸旋溘然長逝時光緒十六年十月初七日也距生於
嘉慶十六年六月初三日未時得年八十歲嗣子曾澤前
卒女一適同里太學生歸諱康嗣孫元覲業儒沒之三日
其猶子亦旦問傳於余余與王固世好翰香公又爲先君
子執友爰深悉太宜人生平其何敢以不文辭爰爲詮次
如右以俟修邑乘者採擇焉

論曰如太宜人者非所謂內行純備者耶蹟其生平事尊
章相夫子睦鄰瞻族卓卓可稱雖古之桓孟奚以加此而
予獨有感焉者遭家多難子嗣摧折何其命之蹇也然卒

能享大壽邀錫典優游令絡倘亦好施之報歟

喻梅贈公傳畧

會吉章撰

予年弱冠識王君喻梅予與君弟贊卿時同里社爲文會
君弟旋娶予同堂妹爲室有戚誼予與贊卿同舉茂才同
貢成均同應京兆試同被薦俛得復失君弟官京師乞假
歸而予需次校官亦不竟仕予與贊卿出處之際畧同由
是稔君之行詣較詳贊卿在日時時爲予道之今君沒予
感君兄弟並逝追維舊游零落殆盡不禁老淚之浪浪也
爰應君子慶芝之請詮次生平而爲之傳按君姓王氏諱

紹沂字喻梅石谷先生七世孫也會祖際唐字盛斯號一
然妣氏葉祖潮凱字秋園八品銜妣氏衛均以君仲弟貴
貤封五品父元鍾字虞英附貢生候銓州同封戶部主事
加一級妣氏黃封宜人先世有陰德君父虞英先生尤有
幹才爲當途所毘倚君性通達不屑屑爲章句學念大父
年近九旬父又經營世務君少卽承祖業習生計井然有
條理遇疑難事片言可折忠厚待人里黨咸服其慷慨好
施則天性然也君婚娶後艱於舉子重闈命納姬佐筮而
門庭雍睦絕無間言與仲弟贊卿友愛勗以成名贊卿獻

藝京華服官農部俾無內顧憂皆君力也君既獨支門戶
事親益孝謹粵寇警迫君襄辦團練予與君同事在支川
分局遇事每相籌畫未幾城陷予與君隔絕不相聞後知
君奉父母挈眷口渡江西北親戚亦附之以行寓居海門
家業蕩然君負米養親俾堂上高年忘播越之苦嗚呼孝
行弗可及已事平旋里一門團聚重整田園而君婦云亡
幸側室生子慶芝稍慰親舍含飴之樂焉乃怙恃疊失又
喪長姪慶蘭君意益不自得并念弟善病弟有事必爲畫
策不以彼我歧視尤人所難君年近八旬而精神彊健事

必躬親凡重建忠壯公石谷公專祠經理儒寡局同與堂
重建總管廟及一切地方善舉無不力任後雖退閒猶時
時爲後人告語冀有繼其志者蓋其存心利濟終身如一
日也比年辛卯仲弟逝世甲午從子慶蓉病歿金陵旅次
君盡然心傷老懷滋戚君子慶芝少補諸生歲試列高等
食廩餼爲一開顏而君之精神耗矣君夙患痰喘氣逆症
今冬時作兼患咯血十一月二十三日染疾益劇竟至不
起悲夫君生於嘉慶二十三年戊寅八月二十日卯時歿
於光緒二十一年乙未十二月初一日卯時春秋七十有

八配錢氏繼以華君以奉兩親命錢宜人有遺言以華氏
賢立爲繼室子一慶芝女四一適魏錫栴一適屈海鰲一
適蔡鍾漢一幼殤孫二振孫鈞孫孫女二
後慶芝以知縣分浙江任處州府慶元縣加同知銜賞
戴花翎晉三級贈中議大夫
誥封恭人晉封淑人喻梅公繼配華太淑人傳
古者內言不出於閨故古來奇節偉行多不見於列女傳
而庭闈中日用居處飲食微細庸近之事恒人又往往忽
之竊獨以爲不然蓋天地之生人也父尊而母親故趨庭

三上家苑卷一
之訓雖嚴而爲時暫暫則易忘若夫自昕至夕自卯角至
終身自起居食息至讀書砥行則母教爲多惟地道無成
故世鮮克知之而吾則謂觀其子之才即可覩其母之教
觀於華太淑人之事而知之矣按狀太淑人姓華氏心出
公之女誥封中議大夫王公喻梅之繼室也幼有淑德年
十七而嫁方是時王公元配錢太淑人猶在堂太淑人侍
奉醫葯久而益虔錢太淑人以太淑人賢遺命立爲繼室
自是主持中饋早作而晏息手營而口授百務填委臧婢
告瘁太淑人猶分條晰縷無倦虺俾中議公無內顧憂者

太淑人之力也光緒二十一年中議公病卒太淑人猝遭
大故痛不欲生入則泣血柴立茹檠自盟出則支持門戶
課孫訓子益屏去華飾持齋繡佛率以爲常至老弗怠二
十七年太淑人命其子慶芝納粟由廩貢生得知縣分發
浙江三十一年春命入都赴引旣歸到省將行太淑人諭
之曰汝當強仕之年正宜出而問世惟持躬總以廉正清
勤爲第一待人之道甯寬毋刻操此以往其庶幾免於戾
乎大哉言乎非夫末俗華靡之家斷斷乎富貴利祿之女
子所能知而能言者也嗚呼足以傳矣太淑人生於道光

二十二年壬寅五月二十六日辰時卒於光緒三十二年
丙午二月二十四日丑時春秋六十有五子一慶芝女四
長錢太淑人撫甥女爲己女適同邑魏錫枋次適屈海鰲
三適蔡鍾漢四幼殤孫男二振孫鈞孫孫女二

論曰夫子贊易言積善之家必有餘慶而繫之坤蓋順也
禮曰婦順備而後內和理內和理而後家長久也末俗人
心囂競往往喜矯厲奇絕之行論婦道亦侈義烈而忽庸
行夫義烈誠足尙然君子行不貴苟難矧婦人以順從爲
義觀太淑人生平宜若平近無奇者而節儉勤苦孝慈敦

睦數十年而不渝天下之至順孰逾是哉卽天下之至難
又孰逾是哉

賜進士出身誥授中憲大夫侍講銜翰林院編修世愚姪
胡炳益拜撰

誥授奉直大夫戶部四川司主事兼山西司行走加一級
附貢生贊卿王君傳

君諱紹俊字贊卿昭文人係宋忠臣堅之後其七世祖諱
輦以畫供奉內廷名重海內曾祖諱際唐祖諱潮凱皆
以孝行著於鄉里考諱元鍾附貢生好善有隱德舉二子

君其仲也少豐穎性至孝七歲能詩比長益篤於學道光
丁未補博士弟子員咸豐戊午貢成均納粟入官以主事
分戶部四川司兼山西司行走居官清介庚申粵寇擾江
浙君卽乞假南旋奉兩親避居江北色養承歡不敢遠離
迨城復歸里二親相繼棄養哀毀逾恒自此不復作出山
計屢薦於鄉不售性泊如也胸次渾厚不省人間有機械
事與伯兄喻梅友愛甚篤怡怡無間言同治壬申於舊宅
之東另闢新第析居而朝夕往還尤加親愛所與交輒盡
心力相劇切以義屏絕無益遊戲自奉儉約好讀書經史

而外旁及百家雖盛暑嚴寒而學如不及未嘗一日釋卷
尤喜吟詠著有詩文若干卷晚年杜門謝客惟以花草自
娛余與君爲道義交相得甚懽猶憶同客都門促膝晤語
昕夕相從及今思之能無愴感君生於道光四年甲申八
月十四日寅時卒於光緒十七年辛卯十月十三日寅時
春秋六十有八配曾氏繼楊氏子三慶蘭慶桂慶蓉慶蘭
慶桂俱幼殤慶蓉縣學廩生孫三瑩孫麟孫國治
傳曰

以誠致行以仁存心惟孝惟友令德是欽農曹觀政紳佩

王日家集卷十
六箴潔身歸隱抱膝長吟望隆北海品重南金有道君子
矜式士林

賜進士出身誥授資政大夫工部左侍郎山東正考官世

愚弟汪鳴鑾拜譔

王君贊卿繼配楊宜人傳

宜人姓楊氏同邑觀察公硯芬先生諱希銓之第五女也
生廣東惠州府知府任所幼明敏比長益嫻禮教動必依
法無博塞嬉娛之事咸豐辛亥來歸王氏爲贊卿先生繼
室入門循謹能以夫子之心爲心佐理家政井井有條處

妯娌以和御僕媪有恩一家雍穆內外無間言咸豐戊午
歲贊卿供職京曹宜人孝事舅姑入厨作羹以供羞膳庚
申粵匪陷蘇常贊卿方乞假南旋遂挈眷渡江流離困苦
宜人朝紡夕績以補不足迨城復遄返相夫重整門楣事
事樽節家日以起光緒丁丑爲其子慶蓉完婚次年子又
生子方謂自此可享含飴之樂而宜人布衣椎髻茹苦習
勤益自儉約凡米鹽瑣屑必躬必親不假手於婢媪臧獲
早作晏息歲以爲常能耐勞苦根於天性且時時爲子婦
勗訓者欲以已之事爲事冀有以善承其後也嗚呼賢已

三曰家乘卷一
宜人生於道光十一年庚寅五月十六日寅時卒於光緒
十六年庚寅十月初九日卯時享年六十有一子三慶蘭
曾出未婚卒慶桂幼傷慶蓉廩膳生女一早殤孫二瑩孫
麟孫

論曰家之興也恒在乎婦人積儉於家庭使閭以內事無
或廢日用百物措置必於其當今觀於宜人之佐治家政
井然不紊自賓祭酒漿以逮澣濯煩擱早作夜思至織至
悉終其身如一日豈與尋常女子所可同年而語者哉
賜進士出身誥授中憲大夫四品銜翰林院編修世侍生

陸懋宗拜撰

旌表貞節清封孺人曹孺人傳

曹孺人國學生廷瑗女許字張市王君曾澤曾澤避粵寇之亂移居太倉璜涇鎮同治元年九月遭疾沒於旅居年僅二十有二孺人間訃悲慟語父母曰女子當從一而終願歸死於夫氏舅炳勳聞之曰曹氏女願守柏舟節吾家雖貧奈何使貞女不得行其志乎遂製素服迎之歸命居老宅月給薪米孺人衣不帛食不精躬自澆炊壹意節儉能承舅姑歡舅姑亦喜得賢婦妯娌有細故爭執則以忍

三上家要卷一
氣二字婉勸之性好奉佛長齋靜修至老不倦從舅命以
姪逢鈞爲曾澤後年十九而沒復以逢鈞弟元覲爲後元
覲績學能文章與兆璋友善民國六年六月兆璋歸自京
師元覲以孺人事畧請爲立傳且曰孺人生於道光十七
年沒於光緒十五年享年五十有三歲孺人沒之明年元
覲生父亦且以孺人苦節請於江蘇學政楊頤給抱淑完
貞額卽以是年冬合葬於先考曾澤公之墓至今歲而孺
人冥齡八十有一矣會修族譜元覲分任纂輯用牒述行
畧乞撰次家傳列之譜牒以示子孫感且不朽矣兆璋讀

而善之曰此殆梅郎中所謂述其親甚似熙甫親爲不死者昔朱蘭坡母汪宜人幼許字崑山先生未婚而寡矢志不貳躬紡績養舅姑十年始以從子爲崑山先生嗣卽蘭坡也宜人撫之如己出及蘭坡貴陳情得旌遂以其事徧徵士大夫爲歌詩以揚之積歲成帙名曰闡貞孺人之遭遇與汪宜人同符而元覲爲法官有聲於時交遊遍宇內則所以顯揚其親者固自有在矣自古貞媛守節但以行志非以求名當其勞身忍性茹荼含辛艱苦卓絕之行歷數十寒暑如一日豈他人所能喻其一二哉然而堅貞淬

厲積久而精神愈不可磨滅必有賢子孫爲之表章懿行
竝煒管彤者孰謂天道之無知邪此亦足以風世也已
賜進士出身侍講銜翰林院編修國史館協修徐兆璋撰
誥授奉政大夫五品銜光祿寺署正蓮洲王君傳
自來採風問俗者流夷攷人才於海濱郊藪之地遑遑畧
之而不知時有古君子鄉先生出其間此必有一二大端
爲當路所引重爲鄉邑所聲稱爲族姓所倚賴否亦泯沒
無聞耳與世同盡乃慨然於人之可傳者難也王君蓮洲
諱履基世居琴川之張墅平日恂恂如寡言笑一若才不

勝任者然乃於其濬白茆河開福山塘督率夫役勤勞備
至上游嘉獎之遂得優保邑中有善舉不特首捐重資必
躬親其事十餘年纘理義莊百廢俱興而積資增田無算
他如修宗祠營祖墓建白茆河一橋罔弗措置盡善以故
鄉里宗族無間言則其才視所任事實恢恢乎有餘力也
年將冠兩應小試不利遂弃去佐其封翁庀家事井然有
條理邇年以鄉居不適卜宅城南之迤東蒔花對酒頤養
天和閒或招二三老友手談作消遣計今秋九月得一孫
含飴懷抱顧而樂之曰世澤可延吾事畢矣臘月七日爲

其母太夫人百齡冥誕眷屬咸集三代一堂敬設齋筵用
資冥福夜未半感微疾不逾時而歸道山春秋六十有八
由國子生納粟爲光祿寺署正晉五品授奉政大夫子紹
晉孫亨源女四適屈適鄭適黃適徐皆望族紹晉以濟與
其家世有連具狀來徵爰綜其生平行事之可傳者書之
竊慨夫世風不古士大夫交濟動率以嫻習官場規摹時
尙爲援引地衣冠優孟而眞意無存欲求如王君之樸素
渾簡遇事則在公言公不借此爲要結而謹守其本來者
蓋十不得一也嗚呼如王君者生則可風於世沒則可祭

於社謂爲古君子也可謂爲鄉先生也可彼夷考人才者亦知海濱郊藪之地有王君其人乎

光緒辛丑孟春

同邑宗汝濟撰

永孚王君學博傳畧

君姓王諱亦且字隽真號永孚宋寧遠節度使忠壯公諱堅二十一世孫居昭文之東鄉張墅父諱炳勳生三子君其季也咸豐初余隨先君讀書於王氏義莊與君同塾余長君一歲遂通譜爲總角交君讀書聰穎尤善悟解父鍾愛之庚申之歲遭亂廢讀居恒蒿目時艱壯心鬱勃往往

拊髀興嗟惟日與諸少年縱酒高歌酣嬉淋漓聊以自遣
或怒馬馳騁習鍊筋骸頗有古人運甓之志會城中賊酋
分股至鄉間劫掠財物名曰打糧而張墅鄰近等處無賴
匪徒復乘間竊發每伺賊踪所過潛入村墟搜攫一空君
懼其蔓延入境將爲先聲奪人之計或有以速禍危君者
君奮袂而起曰髮逆蹂躪城鄉此大劫也彼小醜何敢然
甯我薄人毋人薄我稟於父父壯之乃召里中素所交遊
有膽力材伎者約與舉事料簡丁壯屯積糗糧備器械遠
斥候無事則各相守望一聞蠢動卽率隊撲擊之嗣是而

賊之游騎不敢遠出匪類亦聞風瓦解民卒安堵者皆君之力也洎同治甲子克復後君已完娶生子自恥學問未成出就外傅重理舉子業爲文踔屢風發才思縱橫惟不喜時趨酷摹先正風範以故文品自高而功名亦稍蹭蹬至光緒戊寅科始博一衿五度槐黃終不售而志猶未懈旋居父喪數載長子壽青遊於庠君援例入成均繼以河工事得保舉五品銜於是以科名最後起而已無意進取矣然性好學暇則手一編探索融會務得其要旨與知己論文移晷忘倦居家自奉常薄而厚於待人撫長兄嫂所

遺三女如自己出既長並厚其奩贈而次第遣嫁之其爲人謀也勤懇坦直有不平事輒爲排解善舉所在如水赴壑如施藥貸粟濬河修橋諸事靡不踴躍倡率徒步勸募雖祁寒盛暑弗恤也光緒十一年乙酉江蘇歲大饑鴻嗷四野大吏請於朝方議下免徵之詔而奸胥蠹吏圖中飽匿不以彰催科正亟時鄉戶之富而懦者戀其租入已勉力上供矣至疲戶下農雖罄典鬻不足以償惟有蹙額私語莫敢誰何君廉得其情約同志輩入城詰漕吏面發其覆相持數日不能奪君憤其膏之屯也日夜思有以挽回

之乃先發其困粟百石復力募大戶數十家曉之曰飽貧
囊與賑饑腹均之棄粟也與其喂豺狼何若拯螻蟻乎聞
者欣然願輸不十日而聚米以萬斛計按籍稽戶停租發
賑一時民困大蘇頌聲載道官吏憚其水火遂罷其徵越
四年己丑水澇爲災低區尤酷君議仿行乙酉年故事當
路有難色君竭力借箸事竟以成晚歲半耕半讀惟以教
子弄孫自娛以祖居室隘乃卜築於墅西而遷焉堂構闋
敞輪奐一新作室貽謀可云盡善而心力亦稍瘁矣尋於
光緒十九年十一月初九日卒距生於道光二十五年九

三上家...
二
月初六日享年四十有九夫人娶吳氏生子四長 元齡 邑

庠生娶秦氏次逢鈔殤三 元弼 聘瞿氏四 元凱 俱業儒孫

三長鴻飛次鴻景孫女一畹仙俱幼遷西而數歲堂

贊曰古語云士先志又云有志者事竟成良以有志則可

帥氣使必行而事無難易大小胥賴以決也跡君生平有

志讀書雖輟業久而終得成名固已至其遇事能斷見義

必爲苟無志以帥氣孰能於艱難險阻危疑震撼之交銳

身直任毅然有百折百回之概哉君嘗謂天生我才縱不

獲見用於世亦當稍有建樹以答高厚終不敢闕然消沮

與草木同腐知其志有素定也養其氣而充之則見危授命久要不忘成人之道由此其選也夫

光緒十九年歲在昭陽大荒落涂月上浣

通家兄魏辰朗拜撰

竹溪王公家傳

先生姓王氏諱振基字竹溪號夢香常熟東張市人也梅坡先生之次子而嗣爲湘雲先生後其先系出太原宋節度使謚忠壯諱堅者先生之始祖也歷二十一世而傳至先生先生幼而好學能詩文間亦作畫爲師長所器重旋

遭父喪學遂中輟既洪楊構難擾及閩閩先生被虜至湖
州荆天棘地險阻備嘗事平歸來家無長物惟與一母一
婢苦度星霜耳未幾母沒哀毀逾恒喪葬盡禮一如丁父
憂自此耕讀之餘課徒自給又能爲人寫真栩栩欲活得
者寶之而親朋鄰里有事先生悉力贊襄無德色一鄉稱
之先生初聘司氏未娶而卒後娶同里黃蔚然女內助得
人家庭融洩不幸次子夭折復直值妻疾中年多故憂能傷
人病七日而劇易簣之際神志湛如宣佛號數聲溘然長
逝時清光緒丙戌六月也年四十有六子三長鍾俊次殤

次鍾偉女三孫二曾孫二十七日此先生與鍾俊
方還曰予生也晚不及親見先生而識先生之長君鍾俊
在歲癸丑今年春予客京師鍾俊來書詳述行誼乞爲傳
謹撰次之嗚呼綜先生之生平固無所異於衆殆所謂賢
者不必壽潛德弗曜後世必有昌者歟

民國七年歲次戊午三月上澣
崑山方還撰并書

王谷生先生家傳

先生諱渭陞字谷生吾邑東張市人也爲宋甯遠軍節度

使忠壯公二十一世孫父炳熙生子三先生爲其次以長兄金燮無後命先生嗣之會父及嗣父相繼歿二母煢煢家計日絀先生慨然曰牽車服買用以孝養經訓具在曷敢不勉乃商於白茆新市節食縮衣自其身以迄其妻子無不儉而於事親獨豐閱數年嗣母周氏本生母周氏均卒先生泣曰喪葬以禮吾知之矣然子欲養而親不待我其推養親之願以及我族乎乃以己田四百三十九畝七分六釐立爲義莊以贍族人事聞於朝褒獎如例而先生以疾歿時民國四年九月十九日也先生原配邵氏先卒

繼娶馬氏有婦德自先生歿後復捐田六十一畝五分六釐三毫修建義莊房屋以成先生之志吁可謂賢矣
例得附書

張鴻曰義莊之制自宋范文正公昌大之千餘年來吳中著姓莫不有義莊噫其盛矣然譽者以爲敬宗收族而毀者以爲養惰肇爭兩說相持莫定一是以余觀之夫亦爲子孫者之未盡其道耳若能推先人養族之盛意而輔之以教族中之人咸明理而習業烏覩所謂養惰而肇爭者哉然則先生推養親之意以立義莊亦望後人更推先生

三丘家苑卷一
之志而光大之而非僅以博惠族之譽而已者也王氏其
勉之矣

賜進士第三品銜記名御史刑部主事日本神戶仁川領
事官邑人張鴻謨并書

亡姪慶蓉節畧

紹沂

胞姪慶蓉號鏡平同懷弟贊卿之第三子也贊卿娶曾氏
來歸僅兩年卽以疾卒生冢姪慶蘭亦早世繼娶楊氏觀
察硯芬先生之第五女生慶桂及慶蓉慶桂幼殤慶蓉幼
而岐嶷生有夙慧咸豐戊午贊卿以農部入京供職是冬

慶蓉生庚申緒寇陷省垣贊卿聞警南旋時慶蓉甫三歲
入門抱弄卽依依作孺慕狀雖曰天性然其穎異已迥殊
常見能目辨之無間授以讀卽成誦年十齡工韻語好作
七言散體未成童已哀然成帙十五習舉子業文理條直
絕無穉氣諸父執見之以爲此吾家英物也兩應童子試
卽受知於長樂林錫三文宗凡歲科試輒列優等旋食廩
餼乙酉鄉闈薦而未售然仍好學孜孜不以得失爲念素
明音律時以彈琴賦詩爲樂光緒庚寅楊宜人以暴疾卒
次年冬贊卿復相繼辭世慶蓉連遭大故哀毀逾常次第

完喪葬皆盡禮今春服闋沂因年值大比勗其溫理舊業
勿灰進取之心遂與余子慶芝互相切磋一室中怡怡如
也七夕後一日首途就試初十日抵毘陵是夜忽患寒熱
料無劇疾故未中道折回旋抵白下城十五日在舟中尙
起坐如常詎料於晚間寒熱大作間有囈語至亥刻遽爾
長逝嗚呼傷哉夫人誰不死修短數也然如慶蓉之暴卒
異鄉醫葯不及施妻子不及見竟化異物而歸來也功名
誤人耶造化弄人耶抑何所遭之酷也沂老矣猶睹此佛
逆之境而謂能默然也哉慶蓉生於咸豐八年戊午十二

月十五日戌時卒於光緒二十年甲午七月十五日亥時
年僅三十有七娶張氏卒繼娶歸氏子三長瑩孫張出次
麟孫國治歸出女三
瑞峯先生五十壽言

嚴鎮寰

繹如

癸丑十月廿有四日爲瑞峯王先生五十攬揆令辰親戚
朋好咸擬稱觴晉祝而先生固却之杜門謝客處之如恒
然僕與先生相交有年矣今有一言思欲爲先生告者先
生之意其將以五十之年爲已及老耶僕則以爲五十之
年如日方中乃正大有可爲之時也曲禮曰四十曰強而

仕五十曰艾服官政猶憶己酉秋先生之任慶元未及一
載遽萌退志誠爲士元非百里才夫安能鬱鬱久居於此
耶次年冬僕以禁烟事于役至慶時先生已乞假歸里而
都人士多樂道善政且有相與歎息者先生工詩善書而
尤精於繪事凡慶人獲得一書一畫莫不珍如拱璧僕嘗
贈以詩曰于役曾經到慶元去思人盡繫王孫豈徒棠樹
留遺愛幾幅梅花共保存默計先生蒞慶蓋時年猶未五
十也昔蘧伯玉行年五十而知四十九年之非陶淵明歸
去來辭亦曰覺今是而昨非如先生才膺民社遂請歸田

抑何急流勇退有如是耶顧僕謂五十之年乃正大有可
爲者何哉夫仲尼宣聖尙云五十以學易又云五十而知
天命今試問先生於易其果相悅以解耶先生之於天命
其果知之已精耶若猶未也則正宜如切如磋如琢如磨
以自淬厲夫安得以五十之年遂視爲可自暇逸之時耶
雖然先生自視欲然實有遠過乎人者僕爲此言似未免
以天之高而管窺之以海之深而蠡測之惟言者無罪聞
者足戒先生年五十乃正如日之方中其德業當必有與
年俱進者用敢貢其芻蕘或作高深之一助卽以此爲先

生壽先生其許我晉一觴乎

王貞女傳

王貞女婉僊者邑東偏張墅人也王故盛族多賢者女生而慧長歆於禮終歿之日截耳不嫁以事其父綬青母秦氏夫女子生而願爲有家此爲父母者常情爲之女而性有獨至至不願適人者順則如木蘭之從軍變則如曹娥之浮江前史所豔稱儒者所亟許自禮教陵遲女子視父母之家如傳舍致有女生外向之諺不得於其父母者必不能得於其夫與其舅姑此家之所以不易齊也女之所

鄙也西俗薄家庭女子多喜不嫁避撫育子女之累與吾
華貞女所志遙殊此今世所稱宗族社會與軍國社會二
主義不相容者也跡類而旨異女之所不與比也女之兄
鴻飛爲述女七歲守輦戒販佛不字三十而卒卒時猶謂
兄善事堂上豈以女之慧而爲釋家言誘掖至此彼教愛
無差等是殆不然亦漸於父兄之教而能也女固自勵其
志所獨至盛年房室花落無言行徒息駕休者忘餐珍持
不懈傾色笑於綵衣之列無俟信今而傳後然而其幽不
可不闡故爲辨其所鄙與其所不與比者推其本於父兄

之教綴而爲之傳。汎汎其德不與。其本始父。只
民國七年歲在戊午冬。既無射計。今而斯。好然而其幽不
志。汎汎至。益平。既室。亦。善。無言。并。其。同。里。時。雄。飛。撰。念。其
無。望。善。景。故。不。然。亦。滿。飲。矣。只。文。燦。而。須。也。文。國。自。潤。其
只。管。事。堂。士。豈。以。文。文。懸。而。爲。釋。來。奇。類。第。至。也。善。燦。變
斷。乘。爲。並。文。小。類。也。輩。既。則。將。不。字。三。十。而。卒。卒。和。解。能
主。進。不。財。容。肯。也。機。廉。而。旨。異。文。文。汎。不。與。其。也。父。文。只
華。貞。文。汎。志。鍾。德。此。今。母。汎。縣。宗。赫。旅。會。與。軍。附。玩。會。一
臨。山。西。掛。新。旅。到。女。平。冬。喜。不。對。無。無。育。于。女。文。累。與。喜

氏族之學始於魏晉盛於隋唐歷五季至宋譜學寢墜迨廬陵
眉州起而振興之體例殊而指歸則一也今士夫家踵事譜牒
皆足取法吾家系譜始刻於有明洪武甲子再刻於國朝順
治癸巳厥後雲初繁衍源合流分道光年間吾王氏創始義莊
卽有修譜之舉舊譜始宋忠壯公遞至十六世後各修房譜又
析爲十一支并附入傳誌碑銘彙成卷帙告成有日擬付梓人
旋中輟迄今三十餘年去年春莊裔同議將舊時所訂譜牒較
勘修纂撥義莊餘款爲剗刷費以竟前人未竟之志
實襄其役謹叙其緣起如此同治十二年六月二十世孫

福燾
敬述

紹俊

續修家乘跋

先君子奉直公嘗言家乘十年必一修庶無失考

元觀

是時

尚幼聞斯言謹誌不忘比長誦李二曲張蒿庵陸桴亭周
櫟園諸先生所著書悉於敬宗收族之義恒孳孳垂教人
皆知敬宗收族之根本乃在義田之置立而不知敬宗收
族之緣起先貴譜牒之精詳二者並重義田之設祖宗創
之子孫保之賢者又復擴充之而能事畢矣若夫譜牒之
學當詳搜博考壹志搏心未可率爾從事也二曲先生曰
述先祖不論年齒齒齷者凡有卓卓可傳者必詳書之備後

人觀感蒿庵先生曰譜牒條例必別出一卷凡忠孝節烈
方聞義行必甄錄其傳狀而彙列之名曰藝文雖沒世而
名不朽桴亭先生曰祖宗冢墓方向地址丈尺必繪圖立
說雖遭世變而邱壠可考櫟園先生曰有著作可傳不論
詩文不論有專集無專集必登數篇使後人知籟金之傳
不足貴詩書之澤甚足珍統觀四說知纂輯譜牒胥於此
入手元觀何人敢一一比附先哲而彌綸無闕乎惟是倦
倦庭訓不敢一日去諸懷自蓼莪抱痛霜露興嗟義莊事
務日且廢弛修譜之事族中更無議及茲事重大幼輩無

知何敢顧問

元觀

禱昧蹙處鄉隅見聞謏陋自顧一無所

長悚然自惕乃遊學滬江遠歷日本而又公私奔走未遑
將事宜統辛亥暫歸閩井重整莊規適遭國變地方事務
紛如亂絲桑梓敬恭畧爲整理旋復薄宦川沙勞形案牘
一念承述先志無任悚惶甲寅四月解組告歸顧瞻族郇
支系漸繁每憶趨庭之訓乃毅然以修譜自任蓋及今編
纂猶慮考訂不詳乙卯歲凶未遑握槩丁巳正月會集莊
裔公同商榷叔兄夢良從弟錦裳等翊贊之遂定調查日
期從事編輯告成之日亦約畧預定乃是月下浣義莊正

門失慎猶幸地隔一水不至延燒是年三月重行建築規復舊觀而譜事依議進行未敢中止今春三月稿成開雕

有日

元觀

當初自愧菲材胡敢主議修纂祇以先君子遺

言在耳勉任其事比年以來網羅故實查考宗支稽訪冢墓蒐討遺文雖病體支離而昕夕記錄未肯怠忽今幸告厥成功揆之李張陸周四先生之精論於本書體例容或有未盡當再事探索而按之先君子遺言庶可釋然於心乎然而元觀更有黽勉而不敢自寬者先君子生平厚待宗族必使子弟崇文學嫻禮讓各有職業毋使失所其言

家乘必十年一修正有無窮之屬望豈僅周諮博訪書名氏
詳年歲云爾哉小子尋繹言外之意恍然而有得焉就吾
東張市一隅論居然聚族而居族必有主主必立宗歲時
宴聚長幼咸在粲然有文以相接驩然有恩以相愛拭尊
勸飲其父兄以禮自處其子弟有情自通其在詩曰執豕
于牢酌之用匏食之飲之君之宗之斯時敬宗收族之意
釐然備矣有子曰君子務本本立而道生孝弟也者其爲
仁之本與當世風媮薄之秋吾輩當以人紀自飭旣致力
於譜牒之學復用心於彝倫之敘此區區之意將上述先

志下詔後昆有以也夫有以也夫此為國之...

民國七年冬十二月...世孫元觀謹跋

是譜於民國八年夏...江蘇通志

局飭縣徵訪金石邑令葉公祖修函請採訪因此未能

悉心校讎俟有餘閒當再勘誤元觀附識其亦精曰...

東乘身世...以昧避艱...

東乘市一...宗...

精半...而...

乘...書...